

S2651-7

884

少小嬰孺方

序例
客忤

初生出腹
傷寒

驚癇

千金方衍義卷六

孫真人千金方衍義卷五上

長洲張璐路玉著

南沙席世臣鄧客校

少小嬰孺方上

凡五類

序例第一

論三首
擇乳母法

方二首

論曰夫生民之道莫不以養小為大若無於小卒不成大故易稱積小以成大詩有厥初生民傳曰聲子生隱公此之一義卽是從微至著自少及長人情其見不待經史故今斯方先婦人小兒而後丈夫耆老者則是崇本之義也然小兒氣勢微弱醫士欲留心

救療立功差難今之學者多不存意良由嬰兒在於

襁褓之內乳氣腥臊醫者操行英雄詎肯瞻視靜言

思之可為太息者矣小品方云凡人年六歲已上為

小十六歲已上為少巢源外臺作十八已上為壯三十已上為壯

巢源外臺作二十已上為壯五十已上為老其六歲已下經所不

載所以乳下嬰兒有病難治者皆為無所承據也中

古有巫妨巢源作巫方者立小兒顛顛經以占天壽判疾

病死生世相傳授始有小兒方焉逮於晉宋江左推

諸蘇家傳習有驗流於人間齊有徐王者亦有小兒

方三卷故今之學者頗得傳授然徐氏位望隆重何

暇畱心於少小詳其方意不甚深細少有可採未爲
至祕今博採諸家及自經用有效者以爲此篇凡百
居家皆宜達茲養小之術則無橫天之禍也

又曰小兒病與大人不殊惟用藥有多少爲異其驚
癇客忤解顱不行等八九篇合爲此卷下痢等餘方
並散在諸篇可披而得之

凡生後六十日瞳子成能咳笑應和人百日任脈成
能自反覆一作百百八十日尻骨成能獨坐二百一

十日膝骨成能行此其定法若不能依期者必有不
平之處

凡兒生三十二日一變六十四日再變變且蒸九十
六日三變一百二十八日四變變且蒸一百六十日
五變一百九十二日六變變且蒸二百二十四日七
變二百五十六日八變變且蒸二百八十八日九變
三百二十日十變變且蒸積三百二十日小蒸畢後
六十四日大蒸蒸後六十四日後大蒸蒸後一百二
十八日復大蒸凡小兒自生三十二日一變再變爲
一蒸凡十變而五小蒸又三大蒸積五百七十六日
大小蒸都畢乃成人小兒所以變蒸者是榮其血脈
改其五臟故一變竟輒覺情態有異其變蒸之後變

者上氣蒸者體熱變蒸有輕重其輕者體熱而微驚耳冷尻冷上脣頭白泡起如魚目珠子微汗出其重者體壯熱而脈亂或汗或不汗不欲食食輒吐喎目白精微赤黑精微白又云目白者重赤黑者微變蒸畢自精明矣此其證也單變小微兼蒸小劇凡蒸平者五日而衰遠者十日而衰先期五日後之五日爲十日之中熱乃除耳兒生三十二日一變二十九日先期而熱便治之如法至三十六七日蒸乃畢耳恐不解子故重說之且變蒸之時不欲驚動勿令傍多人兒變蒸或早或晚不如法者多又初變之時或熱

甚者違日數不歇審計變蒸之日當其時有熱微驚
慎不可治及灸刺但和視之若良久熱不可已少與
紫丸微下日歇便止若於變蒸之中加以時行溫病
或非變蒸時而得時行者其證皆相似惟耳及尻通
熱口上無白泡耳當先服黑散以發其汗汗出溫粉
粉之熱當歇便就瘥若猶不除乃與紫丸下之兒變
蒸時若有寒加之卽寒熱交爭腰腹天乳啼不止者
熨之則愈也

熨法出下篇灸粉絮熨者是

變蒸與溫壯傷寒相似

若非變蒸身熱耳熱尻亦熱此乃爲他病可作餘治
審是變蒸不得爲餘治也

又一法凡兒生三十二日始變變者身熱也至六十
四日再變變且蒸其狀臥端正也至九十六日三變
定者候丹孔出而泄至一百二十八日四變變且蒸
以能咳笑也至一百六十日五變以成機關也至一
百九十二日六變變且蒸五機成也至二百二十四
日七變以能匍匐也至二百五十六日八變變且蒸
以知欲學語也至二百八十八日九變以亭亭然也
凡小兒生至二百八十八日九變四蒸也當其變之
日慎不可妄治之則加其疾變且蒸者是兒逆迎月
也蒸者甚熱而脈亂汗出是也近者五日歇遠者八

九日歇也當是蒸上不可灸刺妄治之也

紫圓 治小兒變蒸發熱不解并挾傷寒温壯汗

後熱不歇及腹中有痰癖哺乳不進乳則吐

食癩先寒後熱方

赤石脂

代赭

各一兩

巴豆

三十枚

杏仁

五十枚

右四味為末巴豆杏仁別研為膏相和更搗二千

杵當自相得若硬入少蜜同搗之密器中收三十

日兒服如麻子一丸與少乳汁令下食頃後與少

乳勿令多至日中當小下熱除若未全除明日更

與一九百日兒服如小兒却元盛氣準量增減夏
月多熱善令發疹二三十麻輒一服佳紫圓無所
不療雖下不虛人

衍義

初生變蒸雖所稟不足而於不足之中必有痰癥
內結所以蒸發寒熱紫圓一方藥品頗峻而用法
最緩設慮其峻而因循不卽下手卽將來乳哺日
蘊爲痰有增無減爲驚爲癇靡不由此方以石脂
溫養心脾代赭除腹中邪氣杏仁下氣散寒熱雖
用巴豆蕩練臟腑以二石護持中土故叮嚀致再
服之無傷允爲防微杜漸之的方瀉中寓補之捷

法也一其後驚癇門論中有云四味紫丸逐癇飲
 最良去病速而不虛人赤丸差駛病重者當用之
 林億云方中並無赤丸次後癇結驟滿篇中雙
 紫丸內有硃砂色當赤又力緊於紫丸疑此卽赤
 丸也

按金匱腹滿寒疝宿食篇中有赤丸方用茯苓半
 夏烏頭細辛蜜丸真硃爲色千金不用細辛作人
 參專治寒氣厥逆以中有半夏烏頭之反激且有
 真硃之蕩癇未嘗不散寒積也

黑散 治小兒變蒸中挾時行溫病或非在蒸時

而得行時者方

麻黃

杏仁

各半兩

大黃

六銖

右三味先擣麻黃大黃為散別研杏仁如脂乃細

細內散又擣令調和內密器中一月兒服小豆大

一枚以乳汁和服抱令得汗汗出濕粉粉之勿使

見風百日兒服如棗核以兒大小量之

衍義

於變蒸之中復挾時行邪氣非急為開提中外何

以保全萬一方中大黃蕩滌內結即用麻黃開發

表邪杏仁疎利逆氣蓋大黃原有安和五臟之功

麻黃兼有破除癥堅之力杏仁交通中外乃麻黃

湯之變方守真通聖雙解從此悟出

擇乳母法 煎酥 煎茶 益大黃 煎茶 安味 五細之散

凡乳母者發血氣為乳汁也五情善惡悉是血氣所
生也其乳兒者皆宜慎於喜怒夫乳母形色所宜其
候甚多不可求備但取不胡臭瘦瘦氣嗽癆疥癩癰
白禿癩瘍瀦唇耳聾鼯鼻癩癩無此等疾者便可飲
兒也師見其故灸癍便知其先疾之源也

初生出腹第二 論三首 凡十二事
相兒壽夭法

論曰小兒初生先以綿裹指拭兒口中及舌上青泥

惡血此為之玉衡 一作 若不急拭啼聲一發即入腹

成百病矣。兒生落地不作聲者，此由難產少氣故也。可取兒臍帶向身，却將之令氣入腹，仍呵之。至百度，啼聲自發，亦可葱白徐徐鞭之，卽啼。兒已生，卽當舉之。舉之遲晚，則令中寒。腹內雷鳴，乃先浴之。然後斷臍，不得以刀子割之。須令人隔單衣物咬斷，兼以暖氣呵七遍，然後纏結，所留臍帶令至兒足趺上。短則中寒，令兒腹中不調。常下痢，若先斷臍，然後浴者，則臍中水。臍中水則發腹痛。其臍斷訖，連臍帶中多有蟲，宜急剔撥去之。不爾，入兒腹成疾。斷兒臍者，當令長六寸長，則傷肌。短則傷藏。不以時斷，若按汁不盡。

則令暖氣漸微自生寒令兒臍風生男宜用其兒父
故衣裹之生女宜以其母故衣皆勿用新帛爲善不
可令衣過厚合兒傷皮膚害血脈發雜瘡而黃兒衣
綿帛特忌厚熱慎之慎之凡小兒始生肌膚未成不
可暖衣暖衣則令筋骨緩弱宜時見風日若都不見
風則令肌膚脆軟便易中傷皆當以故絮衣之勿用
新綿也凡天和暖無風之時令母將兒於日中嬉戲
數見風日則血凝氣剛肌肉牢密堪耐風寒不致疾
病若常藏在帷帳之中重衣溫暖譬猶陰地之艸木
不見風日輒脆不堪風寒也凡裹臍法推治自練令

柔軟方四寸新綿厚半寸與帛等合之調其緩急急
則令兒吐喎兒生二十日乃解視臍若十許日兒怒
啼似衣中有刺者此或臍燥還刺其腹當解之易衣
更裏裏臍時閉戶下帳燃火令帳中溫暖換衣亦然
仍以溫粉粉之此謂冬時寒也若臍不愈燒絳帛末
粉之若過一月臍有汁不愈燒蝦蟆灰粉之日三四
次若臍中水及中冷則令兒腹絞痛天札啼呼面目
青黑此是中水之過當灸粉絮以熨之不時治護臍
至腫者當隨輕重重者便灸之乃可至八九十壯輕
者臍不大腫但出汁時時啼呼者擣當歸末和胡粉

傳之炙絮日熨之至百日愈以啼呼止爲候若兒糞
青者冷也與臍中水同兒洗浴斷臍竟襁抱畢未可
與朱蜜宜與甘艸湯以甘艸如手中指一節許打碎
以水二合煮取一合以綿纏沾取與兒吮之連吮汁
計得一蜺殼入腹止兒當快吐吐去心胸中惡汁也
如得吐餘藥更不須與若不得吐可消息計如飢渴
須與更與之若前所服及更與並不得吐者但稍稍
與之令盡此一合止如得吐去惡汁令兒心神知慧
無病也飲一合盡都不吐者是兒不含惡血耳勿復
與甘艸湯乃可與朱蜜以鎮心神安魂魄也兒新生

三日中與朱蜜者不宜多多則令兒脾胃冷腹脹喜
陰癘氣急變噤瘳而死新生與朱蜜法以飛鍊硃砂
如大豆許以赤蜜一蜆殼和之以綿纏筋頭沾取與
兒吮之得三沾止一日令盡此一豆許可三日與之
則用三豆許也勿過此則傷兒也與朱蜜竟可與牛
黃如朱蜜多少也牛黃益肝膽除熱定精神止驚辟
惡氣除小兒百病也新生三日後應開腸胃助穀神
可研米作厚飲如乳酪厚薄以豆大與兒咽之頻咽
三豆許止日三與之滿七日可與哺也兒生十日始
哺如棗核二十日倍之五十日如彈丸百日如棗若

乳汁少不得從此法當用意小增之若三十日而哺者令兒無疾兒哺早者兒不勝穀氣令生病頭面身體喜生瘡愈而復發令兒羸弱難養三十日後雖哺勿多若不嗜食勿強與之強與之不消復生疾病哺乳不進者腹中有痰癖也當以因物紫丸微下之節哺乳數日便自愈小兒微寒熱亦當爾利之要當下之然後乃瘥凡乳兒不欲太飽飽則嘔吐每候兒吐者乳太飽也以空乳乳之卽消日四乳兒若臍未愈乳兒太飽令風中臍也夏不去熱乳令兒嘔逆冬不去寒乳令兒欬痢母新房以乳兒令兒羸瘦交膈不

能行母有熱以乳兒令變黃不能食母怒以乳兒令
善驚發氣痛又令上氣癲狂母新吐下以乳兒令虛
羸母醉以乳兒令身熱腹滿凡新生小兒一月內常
飲猪乳大佳凡乳母乳兒當先極按散其熱氣勿令
汗奔出令兒噎輒奪其乳令得息息已復乳之如是
十返五返視兒飢飽節度知一日中幾乳而足以爲
常又常提去宿乳兒若臥乳母當以臂枕之令乳與
兒頭平乃乳之令兒勿噎母欲寐則奪其乳恐填口
鼻又不知飢飽也浴兒法凡浴小兒湯極須令冷熱
調和冷熱失所令兒驚亦致五臟疾也凡兒冬不可

久浴浴久則傷寒夏不可久浴浴久則傷熱數浴背
冷則發癩若不浴又令兒毛落新生浴兒者以猪膽
一枚取汁投湯中以浴兒終身不患瘡疥勿以雜水
浴之兒生三日宜用桃根湯浴桃根梅根李根各二
三枝咬咀以水三斗煮取二十沸去滓浴兒良去不
祥令兒終身無瘡疥治小兒驚辟惡氣以艾虎湯浴
艾一觔虎頭骨一枚以水三斗煮爲湯浴但須浴則
煮浴之凡小兒初出腹有鵝口者其舌上有白屑如
米劇者鼻中亦有之此由兒在胞胎中受穀氣盛故
也或妊娠時嗜糯米使之然治之之法以髮纏筋頭

活井花水撩拭之三日如此便脫去如不脫可煮粟
莢汁合濃以綿纏筋頭拭之若春夏無粟莢可煮栗
木皮如用井花水法小兒初出腹有連舌舌下有膜
如石榴子中隔連其舌下後喜令兒言語不發不轉
也可以瓜摘斷之微有血出無害若血出不止可燒
髮作灰未傅之血便止也小兒出腹六七日後其血
氣收斂成肉則口舌喉頰裏清淨也若喉裏舌上有
物如蘆籜盛水狀者若懸雍有脹起者可以綿纏長
鍼留刃處如粟米許大以刺決之令氣泄去青黃赤
血汁也一刺之止消息一日未消者來日又刺之不

過三刺自消盡餘小小未消三刺亦止自然得消也
有著舌下如此者名重舌有著頰裏及上腭如此者
名重腭有著齒斷上者名重斷皆刺去血汁也小兒
生輒死治之法

當喉視兒口中懸雍前上腭有泡者以指摘取頭
決令潰去血勿令血入咽入咽殺兒急急慎之

小兒初出腹骨肉未斂肌肉猶是血也血凝乃墜成
肌肉耳其血沮敗不成肌肉則使面目繞鼻口左右
悉黃而啼閉目聚口撮面口中乾燥四肢不能伸縮
者皆是血脈不斂也喜不育若有如此者皆宜與龍

瞻湯也

方出本卷
驚癩篇

相兒壽天法

兒初生叫聲連延相屬者壽

聲絕而復揚急者不壽

啼聲散不成人

啼聲深不成人

臍中無血者好

臍中小者不壽

通身軟弱如無骨者不壽

鮮白長大者壽

自開目者不成人

目視不正數動者大非佳

汗血者多厄不壽

汗不流不成人

小便凝如脂膏不成人

頭四破不成人

常搖手足者不成人

早坐早行早齒早語皆惡性非佳人

頭毛不周匝者不成人

髮稀少者強不聽人一作不聰

額上有旋毛者早貴妨父母

兒生髀骨不成者能言而死

尻骨不成者能倨而死

掌骨不成者能匍匐而死

踵骨不成者能行而死

臍骨不成者能立而死

身不收者死

魚口者死

股間無生肉者死

頤下破者死

陰不起者死

陰囊下白者死赤者亦死

卵縫通達黑者死

論曰兒三歲已上十歲已下視其性氣高下卽可知
其天壽大略兒小時識悟通敏過人者多天大則項
裏顏回之流是也小兒骨法成就威儀迴轉遲舒稍
費人精神雕琢者壽其預知人意迴旋敏速者亦天
卽楊修孔融之徒是也由此觀之天壽大略可知也
亦猶梅花早發不覩歲寒甘菊晚成終於年事是知
晚成者壽之兆也

驚癇第三

論三首 方十三首
灸法二十六首

論曰少小所以有癇病及瘈病者皆由臟氣不平故也
也新生卽癇者是其五臟不收敛血氣不聚五臟不
流骨怯不成也多不全育其一月四十日已上至期
歲而癇者亦有乳養失理血氣不和風邪所中也病
先身熱掣癇驚啼叫喚而後發癇脈浮者爲陽癇病
在六腑外在肌膚猶易治也病先身冷不驚掣不啼
呼而病發時脈沉者爲陰癇病在五臟內在骨髓極
難治也病發身軟時醒者謂之癇也身強直反張如
弓不時醒者謂之瘈也諸反張大人脊不容側手小

兒容三指者不可復治也凡脈浮之與沉以判其病
在陰陽表裏耳其浮沉復有大小滑澀虛實遲駛諸
證各依脈形爲治神農本艸經說小兒驚癇有一百
二十種其證候微異於常便是癇候也初出腹血脈
不斂五臟未成稍將養失宜卽爲病也時不成人其
經變蒸之後有病餘證並寬惟中風最暴卒也小兒
四股不好驚掣氣息小異欲作癇及變蒸日滿不解
者並宜與龍膽湯凡小兒之癇有三種有風癇有驚
癇有食癇然風癇驚癇時時有之十兒之中未有一
二是風驚者凡是先寒後熱發者皆是食癇也驚癇

皆按圖灸之風癩當與豬心湯食癩當下乃與紫丸

作凡小兒所以得風癩者緣衣暖汗出風因入也風

癩者初得之時先屈指如數乃發作者此風癩也驚

癩者起於驚怖大啼乃發作者此驚癩也驚癩微者

急持之勿復更驚之或自止也其先不哺乳吐而變

熱後發癩者此食癩早下則瘥四味紫丸逐癖飲最

良去病速而不虛人赤丸差駛方中本無赤丸詳後

雙紫丸用硃砂色當赤疑即赤丸也病重者當用之凡小兒不能乳哺

當與紫丸下之小兒始生生氣尚盛但有微惡則須

之必無所損及其愈病則致深益若不時下則成

大疾疾成則難治矣凡下四味紫丸最善雖下不損

人足以去疾若四味紫丸不得下者當以赤丸下之

赤丸不下當倍之若已下而有餘熱不盡當按方作

龍膽湯稍稍服之并摩赤膏方見本篇末風癩亦當下之

然當以猪心湯下之驚癩但按圖灸之及摩生膏方見

本篇末不可大下也何者驚癩心氣不定一作下之內

虛益令甚爾驚癩甚者特為難治故養小兒常慎驚

勿令聞大聲抱持之間當按徐勿令驚怖又天雷時

當塞兒耳井作餘細聲以亂之也凡養小兒皆微驚

以長其血脈但不欲大驚大驚乃灸驚脈若五六十

日灸者驚復更甚生百日後灸驚脈乃善兒有熱不
欲哺乳臥不安又數驚此痛之初也服紫丸便愈不
愈復與之兒眠時小驚者一月輒一以紫丸下之減
其盛氣令兒不病痛也兒立夏後有病治之慎勿妄
灸不欲吐下但以除熱湯浴之除熱散粉之

除熱湯散見下

篇傷寒條中

除熱赤膏摩之又以膏塗臍中令兒在涼處

勿衍禁水漿常以新水飲之小兒衣甚薄則腹中乳
食下消不消則大便皆醋臭此欲為瘕之漸也便將
紫丸以微消之服法先從少起常令大便稀勿大下
也稀後便漸減之不醋臭乃止藥也凡小兒冬月下

無所畏夏月下難瘥然有病者不可不下下後腹中
當小脹滿故當卽哺乳數日不可妄下又乳哺小兒
當令多少有長劑兒漸大當小小增之若減少者此
腹中已有小不調也便微服藥勿服哺之但當與乳
甚者十許日微者五六日止哺自當如常若都不肯
食哺而但欲乳者此是有癖爲疾重要當下之不可
不下不下則致寒熱或吐而發癩或更致下痢此皆
病重不早下之所爲也此卽難治矣但先治其輕時
兒不耗損而病可速愈凡小兒屎黃而臭者此腹中
有伏熱宜微將服龍膽湯若白而酷臭者此挾宿食

不消也當服紫丸微者少與藥令內消甚者小墾藥
令小下皆復節乳哺數日令胃氣平和不若節乳哺
則病易復復下之則傷其胃氣令腹脹滿再三下之
尚可遇則傷矣凡小兒有瘕其脈大必發癩此為食
瘕下之便愈當審候掌中與三指脈不可令起而不
時下致於發癩則難療矣若早下之此脈終不起也
脈在掌中尚可早療若至指則病增矣凡小兒腹中
有疾生則身寒熱寒熱則血脈動動則心不定心不
定則易驚驚則癩發速也

候癩法

夫癩小兒之惡病也。或有不及求醫而致困者也。然氣發於內，必先有候。常宜審察其精神而探其候也。手白肉魚際脈黑者是癩候。魚際脈赤者熱。

脈青大者寒，脈青細者為平也。

鼻口乾燥大小便不利是癩候。

眼不明上視喜陽是癩候。

耳後完骨上有青絡盛臥不靜是癩候。青脈刺

之令血出也。

小兒髮逆上啼笑而暗色不變是癩候。

鼻口青時小驚是癩候。

目閉青時小驚是癩候

身熱頭常汁出是癩候

身熱吐喎而喘是癩候

身熱目時直視是癩候

喜欠目上視是癩候

身熱目視不精是癩候

目瞳子卒大黑於常是癩候

臥惕惕而驚手足振搖是癩候

臥夢笑手足動搖是癩候

意氣下妄怒是癩候

咽乳不利是癰候

身熱小便難是癰候

吐利不止厥痛時起是癰候

弄舌搖頭是癰候

已上諸候二十餘條皆癰之初也見其候便瓜其
陽脈所應灸瓜之皆重手令兒驟啼及足絕脈亦
依方與湯直視瞳子動腹滿轉鳴下血身熱口噤
不得乳反張脊強汗出發熱爲臥不悟手足掣瘈
善驚凡八條癰之極者也如有此非復湯瓜所能

救便當時灸之

論曰若病家始發便來詣師師可診候所解爲法作
次序治之以其節度首尾取瘥也病家已經雜治無
次序不能制病病則變異其本候師便不知其前證
虛實直依其後證作治亦不得瘥也要應精問察之
爲前師所配依取其前蹤跡以爲治乃無逆耳前師
處湯本應數劑乃瘥而病家服一兩劑未効便謂不
驗以後更問他師師不尋前人爲治寒溫次序而更
爲治而不次前師治則弊也或前已下之後須平和
療以接之而得瘥也或前人未下之或不去者或前
治寒溫失度後人應調治之是謂治敗病皆須邀射

之然後免耳不依次第及不審察必及重弊也

龍膽湯 治嬰兒出腹血脈盛實寒熱溫壯四肢

驚掣發熱大吐哕者若已能進哺中食實不消

壯熱及變蒸不解中客人鬼氣并諸驚癇方悉

主之十歲已下小兒皆服之小兒龍膽湯第一

此是新出腹嬰兒方若日月長大者以次依此

爲例若必知客忤及有魅氣者可加入參當歸

各如龍膽多少也一百日兒加三銖二百日兒

加六銖一歲兒加半兩餘藥皆準耳

龍膽

鈎藤皮

柴胡

黃芩

桔梗

芍藥

茯苓

一作扶神

甘艸

各六銖

蟬螂 二枚

大黃

一兩

右十味咬咀以水一升煮取五合為劑也服之如
 後節度藥有虛實虛藥宜足數合水也兒生一日
 至七日分一合為三服兒生八日至十五日分一
 合半為三服生十六日至二十日分二合為三服
 兒生二十日至三十日分三合為三服兒生三十
 日至四十日盡以五合為三服皆得下即止勿再
 服也

二金方下卷卷五二

七

掃葉山房

衍義紫丸治初生小兒痰癖內結龍膽湯治初生小兒

血脈實盛原其痰癖良因母氣虛寒乳哺不化而

結詳其實盛多緣母之嗜慾不節毒遺胎息而熱

殊非稟氣之充血脈有餘之謂蓋結非熱不散實

非寒不解龍膽苦寒專祛肝旺實熱鈎藤柴胡黃

芩芍藥皆清理二家之匡佐蜣螂一味方中罕用

考之本經為小兒驚癇癰癰之專藥為藥中健卒

得大黃為內應何憚彈丸不尅耶茯苓甘艸用以

留中安輯邦畿尤不可缺此與紫丸分途異治功

力並馳

大黃湯治少小風癰積聚腹痛天矯二十五癰

方

大黃

人參

細辛

乾薑

當歸

甘皮

各三銖

右六味咬咀以水一升煮取四合服如棗許大日

三

衍義

方下所治少小風癰明是木邪內盛乘尅中土殊

非外風襲入之謂故於理中方內除去白朮之滯

甘艸之緩但取參薑參入細辛以散內盛之風當

歸以調紊亂之血甘皮以豁壅遏之痰大黃以滌

固結之積與黃龍湯同一手筆彼以病氣盤錯胃
氣傷殘雖用硝黃徒增脹滿必藉人參大力以鼓
蕩練之威此以孩提血氣未實不勝病氣留連雖
宜大黃迅掃必兼參薑溫散可無傷中之虞然此
僅堪為智者道難使庸俗知也

白羊鮮湯 治小兒風癩胸中有痰方

白羊鮮 三銖卽白蘇皮 蚱蟬 二枚

大黃 四銖

甘艸 鈎藤皮

細辛 各三銖

牛黃 如大豆四枚 蛇蛻皮 一十

右八味咬咀以水二升半煮取一升二合分五服

日三若服已盡而癰不斷者可更加大黃鈎藤各一銖以水漬藥半日然後煮之

術義

白羊鮮卽白蘚本經雖主頭風黃痺濕痺死肌乃兼搜風濕痰氣之藥不獨治外證也蚘蟬蛇蛻牛黃本經皆主驚癇癩病細辛疎利九竅大黃推陳致新甘艸解毒除邪以風癰爲足厥陰之病故用鈎藤爲嚮導也

增損續命湯 治小兒卒中風惡毒及久風四肢角弓反張不隨并躄瘦僻不能行步方

麻黃

甘艸

桂心

各一兩

芍藥

葛根

升麻

當歸

獨活

各十
八銖

人參

黃芩

石膏

各半
兩

杏仁

二十
枚

右十二味咬咀以水六升煮麻黃去上沫乃納諸藥煮取一升二合三歲兒分為四服一日令盡少取汗得汗以粉粉之

衍義

小兒卒中風惡毒角弓反張皆腠理疎豁致病故

於續命本方增入升葛獨活佐麻黃以祛賊風黃

芩佐石膏以解風熱小兒本無內虛故損去乾薑

之辛烈不使真陰受困耳

石膏湯

治小兒中風惡瘵不能語白眼了戾門

肢不隨方

石膏 一兩

麻黃 八銖

甘艸

射干

桂心

芍藥

當歸 各四銖

細辛 二銖

右八味咬咀以水三升半先煮麻黃三沸去上沫
內餘藥煮取一升三歲兒分為四服日三

衍義

此即排風湯之變方於中裁去芎藭杏仁茯苓白

朮防風獨活白蘚生薑加入石膏細辛射干較排
風湯頭緒頗清然排風本諸續命原有石膏以小

兒本非虛寒致病人參乾薑似可無藉但石膏湯
中射干當必因腹中邪逆或兼喉痺咽痛而設若
無上證何復用此寒降之品也

治少小中風狀如欲絕湯方

大黃

牡蠣

龍骨

栝蘂

甘艸

桂心

各十
二銖

赤石脂

寒水石

各六
銖

右八味㕮咀以水一升內藥重半兩煮再沸絞去
滓半歲兒服如雞子大一枚大兒盡服入口中卽

愈汗出粉之藥無毒可每日二服有熱加大黃不

加麻黃無寒水石朴硝代之

衍義

此即風引湯之變方金匱本治大人風引小兒驚
癇立方命名專在引風內泄故用大黃甘艸寒水
石杜風復入故用龍骨牡蠣赤石脂千金取治小
兒中風雖風虛燥熱狀如欲絕然不致擾亂血脉
故於本方除去四石僅留赤石脂寒水石以杜風
潤燥并進栝蓰根而退乾薑單取桂心一味為反
謀其間淺深權度可默識矣

二物石膏湯 治少小中風手足拘急方

石膏

如雞子大一枚碎

真珠

一兩

右以水二升煮石膏五六沸內真珠煮取一升稍

稍分服

衍義

少小中風手足拘急乃驚癇瘖癰漸次然必別有

心胸熱邪證現故專取石膏以化胸中之熱真珠

以清心包之邪不使畱泊而為將來之變端也

桂枝湯 治少小中風脉浮發熱自汗出項強鼻

鳴乾嘔方

即傷寒篇本方見十一卷

二物驢毛散 治少小新生中風方

驢毛

取背前交脊土會中拔取如手拇指大一把

麝香 二豆大

右以乳汁和銅器中微火煎合焦熟出為末小兒

不能飲以乳汁和之葦筒貯瀉著咽中然後飲乳

令入腹

衍義

驢肉動風而驢毛反能治風風氣皆發於毛猶凜

肉痿陽而麋角力能助陽陽精鍾聚於角也加以

麋臍通達經脈外內無所不透總取血肉之性不

傷初生之氣也

茵芋圓 治少小有風癩疾至長不除或遇天陰

節變便發動食飲堅強亦發百脈攣縮行步不

正言語不便者服之永不發方

茵芋葉

鈔丹

秦艽

鈎藤皮

石膏

杜蘅

防葵

各一兩

菖蒲

黃芩

各一兩半

松蘿

半兩

蜣螂

十枚

甘艸

三兩

右十二味為末蜜丸小豆大三歲已下服五丸三

歲已上服七丸五歲已上服十九十歲已上可至

十五丸

衍義

風癰至長不除以成固疾非峻按病根何以求其

克應然須元氣稍堪勝任毒藥者庶可圖治茵芋

為風癰專藥本經治五臟心腹寒熱然世罕識此

頗不易得鈔丹為鎮驚專藥本經治驚癰癩疾取

其鎮墜頑痰也秦艽爲治風逐濕專藥本經治寒
熱邪氣寒濕風痺取其能散風毒也鈎藤爲小兒
驚癇專藥雖無本經可故以意逆之取其專走厥
陰風癇乃厥陰之病也石膏爲清利風熱專藥本
經治中風寒熱心下逆氣驚喘取其能除胃熱也
杜蘅爲杜風祛熱專藥本經治胸脇下逆氣取其
能溫中氣也防葵爲流走經脈專藥本經治癲癇
風邪狂走取其善通結滯也菖蒲爲開通心氣專
藥本經治風寒濕痺取其能利九竅也黃芩爲分
解風熱專藥本經逐水下血閉取其專行少陽也

松蘿爲松上女蘿爲去風平肝專藥本經治癩怒
邪氣取其善療風熱也蜣螂爲拔毒散結專藥本
經治小兒驚癇瘰癧大人癩疾狂陽取其力破痰
血也甘艸爲和中解毒專藥本經治五臟六腑寒
熱邪氣取其調和諸藥也合諸性味參之則永不
復發之功可想望矣

鎮心圓 治小兒驚癇百病鎮心氣方

銀屑

十二銖

水銀

二十銖

牛黃

六銖

大黃

六分

茯苓

三分

茯神

遠志

防已

白薇

雄黃

人參

芍藥各二分

紫石英

真珠

防葵

鐵精各四分

右十六味先以水銀和銀屑如泥別治諸藥和丸

二歲兒如麻子二丸隨兒大小增之一方無牛

黃

行義

鎮心而用銀屑水銀鐵精雄黃石英真珠以鎮其

怯大黃牛黃以滌其痰茯苓神以安其神防已

防葵以破其結芍藥白薇以收其散人參遠志以

發其竅竅隧利而神識清何慮驚痰之不渙散乎

丹參赤膏 治少小心腹熱除熱方

丹參

雷九

芑硝

戎鹽

大黃

各二兩

右五味咬咀以苦酒半升浸四鍾一宿以成練猪
肪一斤煎三上三下去滓乃內芑硝膏成以摩心
下冬夏可用一方但用丹參雷九亦佳

衍義

小兒心腹常熱皆母腹中瘀垢未清血氣不和所
致故用丹參雷九硝黃戎鹽散血逐熱之藥製為
赤膏常摩心下使瘀散血和其熱自除漬用苦酒
專取酸收以固腠理煎用猪肪專取脂澤以潤肌

膚也

五物甘艸生摩膏

治少小新生肌膚幼弱喜為

風邪所中身體壯熱或中大風手足驚掣方

甘艸

防風

各一兩

白朮

桔梗

各二兩

雷丸

二兩

右五味咬咀以不中水豬肪一斤煎為膏以前藥

微火上煎消息視稠濁膏成去滓取如彈丸大一

枚灸手以摩兒百過寒者更熱熱者更寒小兒雖

無病早起常以膏摩顙上及手足心甚辟風寒

衍義

生摩膏摩兒顙門手足以拒風寒僅用煎方中雷

丸一味入於防風白木甘艸桔梗劑中以實皮腠
肌肉但取豬肪熬膏無藉苦酒之峻收也灸手
時摩不特可以杜風并杜驚掣之患此與赤膏皆
外治之良法耳

灸法

論曰小兒新生無疾慎不可逆鍼灸之如逆鍼灸則
忍痛動其五脈因喜成病河洛關中土地多寒兒善
病瘞其生兒三日多逆灸以防之人灸頰以防噤有
噤者舌下脈急牙車筋急其土地寒皆決舌下去血
灸急以防噤也吳蜀地溫無此疾也古方旣傳之今

人不詳南北之殊便按方而用之是以多害於小兒也所以田舍小兒任其自然皆得無有天橫也小兒驚啼眠中四肢掣動變蒸未解慎不可鍼灸爪之動其百脈仍因驚成癩也惟陰癩瘰癧可鍼灸爪之凡灸癩當先下兒使虛乃承虛灸之未下有實而灸者氣逼前後不通殺人癩發平旦者在足少陽晨朝發者在足厥陰日中發者在足太陽黃昏發者在足太陰人是發者在足陽明夜半發者在足少陰

右癩發時病所在視其發早晚灸其所也

夫癩有五臟之癩六畜之癩或在四肢或在腹內當

審其候隨病所在灸之雖少必瘥若失其要則為害也

肝癰之為病面青目反視手足搖灸足少陽厥陰各三壯

心癰之為病面赤心下有熱短氣息微數灸心下第二肋端宛宛中此為巨關又灸手心主及少陰各三壯

脾癰之為病面黃腹大喜痢灸胃管三壯俠胃管傍灸二壯足陽明太陰各一壯

肺癰之為病面目白口沫出灸肺輸二壯又灸手陽

明太陰各二壯

腎癰之爲病面黑正直視不搖如尸狀灸心下二寸
二分三壯又灸肘中動脈各二壯又灸足太陽少陰
各二壯

膈癰之爲病目反四肢不舉灸風府又灸頂上鼻人
中下脘承漿皆隨年壯

腸癰之爲病不動搖灸兩承山又灸足心兩手勞宮
又灸兩耳後完骨各隨年壯又灸臍中五十壯

右五臟癰證候

馬癰之爲病張口搖頭馬鳴欲反折灸項風府臍中

三壯病在腹中燒馬蹄末服之良

牛癩之爲病目正直視腹脹灸鳩尾骨及大椎各三壯燒牛蹄末服之良

羊癩之爲病喜揚目吐舌灸大椎上三壯

猪癩之爲病喜吐沫灸完骨兩傍各一寸七壯

犬癩之爲病手足拳攣灸兩手心一壯灸足太陽一壯灸肋戶一壯

雞癩之爲病搖頭反折喜驚自搖灸足諸陽各三壯
右六畜癩證候

小兒暴癩灸兩乳頭女兒灸乳下二分

治小兒暴癇者身體正直如死人及腹中雷鳴灸太倉及臍中上下兩傍各一寸凡六處又灸當腹度取背以繩繞頸下至臍中竭便轉繩向背順脊下行盡繩頭灸兩傍各一寸五壯

若面白啼聲色不變灸足陽明太陰

若目反上視眸子動當灸顙中取之法橫度口盡兩吻際又橫度鼻下亦盡兩邊折去鼻度半都合口爲度從額上髮際上行度之灸度頭一處正在顙上未合骨中隨手動者是此最要處也次灸當額上入髮二分許直望鼻爲正次灸其兩邊當目瞳子直上入

髮際二分許次灸項上迴毛中次灸客主人穴在眉
後際動脈是次灸兩耳門當耳開口則骨解開動張
陷是也次灸兩耳上捲耳取之當捲耳上頭是也一
法大人當耳上橫三指小兒各自取其指也次灸兩
耳後完骨上青脈亦可以鍼刺令血出次灸玉枕項
後高骨是也次灸兩風池在項後兩轆動肋外髮際
陷中是也次灸風府當項中央髮際亦可與風池三
處高下相等次灸頭兩角兩角當迴毛兩邊起骨是
也

右頭部凡十九處兒生十日可灸三壯三十日可灸

五壯五十日可灸七壯病重者具灸之輕者灸顛中
風池玉枕也艾使熟炷令平正著肉火勢乃至病所
也艾若生炷不平正不著肉徒灸多炷故無益也

若腹滿短氣轉鳴灸肺募在兩乳上第二肋間宛宛
中懸繩取之當瞳子是灸臍中次灸胸堂次灸臍
中次灸薛息薛息在兩乳下第一肋間宛宛中是也
次灸巨闕大人去鳩尾下一寸小兒去臍作六分分
之去鳩尾下一寸是也并灸兩邊次灸胃管次灸金
門在穀道前囊後當中央是也從陰囊下度至大孔
前中分之

右腹部十二處胸堂巨闕胃管十日兒可灸三壯一月已上可五壯陰下縫中可三壯或云隨年壯

若身強反張灸大椎并灸諸藏輸及督脊上當中從大椎度至窮骨中屈更從大椎度之灸度下頭是督脊也

右背部十二處十日兒可灸三壯一月已上可灸五壯

若手足掣癢驚者灸尺澤次灸陽明次灸少商次灸勞宮次灸心主次灸合谷次灸三關次灸少陽

右手部十六處其要者陽明少商心主尺澤合谷少

陽也壯數如上

又灸伏兔次灸三里次灸腓腸次灸鹿溪次灸陽明
次灸少陽次灸然谷

右足部十四處皆要可灸壯數如上

手足陽明謂人四指凡小兒驚癇皆灸之若風病大
動手足掣癱者盡灸手足十指端又灸本節後

客忤第四

論二首
灸法一首

方二十七

論曰小小所以有客忤病者是外人來氣息忤之一
名中人是爲客忤也雖是家人或別房異戶雖是乳
母及父母或從外還衣服經履鬼神粗惡暴氣或牛

馬之氣皆爲忤也熱作喘息乳氣未定者皆爲客忤其乳母遇醉及房勞喘後乳兒最劇能殺兒也不可不慎凡請乘馬行得馬汗氣臭未盥洗易衣裝便向兒邊合兒中馬客忤兒卒見馬來及聞馬鳴驚及馬上衣物馬氣皆合小兒中馬客忤慎護之特重一歲兒也凡小兒衣布帛綿中不得有頭髮履中亦爾白衣青帶青衣白帶皆合中忤凡非常人及諸物從外來亦能驚小兒致病欲防之法諸有從外來人凡有異物入戶當將兒避之勿令見也若不避者燒牛屎令常有煙氣置戶前則善

小兒中客爲病者無時不有此病也而秋初一切小兒皆病者豈是一切小兒悉中客邪夫小兒所以春冬少病秋夏多病者秋夏小兒陽氣在外血脈嫩弱秋初夏末晨夕時有暴冷小兒嫩弱其外則易傷暴冷折其陽陽結則壯熱胃冷則下痢是故夏末秋初小兒多壯熱而下痢也未必皆是中客及魘也若治少小法夏末秋初常宜候天氣溫涼也有暴寒卒冷者其少小則多患壯熱而下痢也慎不可先下之皆先殺毒後下之耳元中記云天下有女鳥名曰姑獲

時後子母秘錄作烏獲

一名天帝女一名隱飛鳥一名夜行遊

女又名鈞星鬼喜以陰雨夜過飛鳴徘徊人村里喚
得來者是也鳥淳雌無雄不產陰氣毒化生喜落毛
羽於人中庭置兒衣中便令兒作癇病必死卽化爲
其兒也是以小兒生至十歲衣被不可露也七八月
九忌

凡中客忤之爲病類皆吐下青黃白色水穀解離絞
痛天糺面色變易其候似癇但眼不上插耳其脈急
數者是也宜與龍膽湯下之加人參當歸各如龍膽
秤分等多少也小兒中客急視其口中懸雍左右當
有青黑腫脈核如麻豆大或赤或白或青如此便宜

用鍼速刺瀆去之亦可爪摘決之并以綿纏釵頭拭去血也少小中客之爲病吐下青黃赤白汁腹中痛及反側偃側喘似癰狀但目不上插少睡耳面變五色其脈弦急若失時不治小久則難治矣欲療之方用豉數合水拌令濕擣熟丸如雞子大以摩兒顙及手足心各五六遍畢以丸摩兒心及臍上下行轉摩之食頃破視其中當有細毛卽擲丸道中痛卽止

治少小中客忤項強欲死方

取衣中白魚十枚爲末以傅母乳頭上令兒飲

之入咽立愈 一方二枚著兒母手掩兒臍中
兒吐下愈亦以摩兒項及脊強處

又方

吞麝香大豆許立愈

治小兒卒中忤方

剪取驢前膊胛上旋毛大如彈子以乳汁煎之
令毛消藥成著乳頭飲之下喉卽愈

又方

燒母衣帶三寸并髮合乳汁服之

又方

取牛鼻津服之或牛口沫傅乳頭飲之

一物猪蹄散 治小兒寒熱及赤氣中人方

取猪後足懸蹄燒末擣篩以飲乳汁一撮立効

治少小卒中客忤不知人者方

取熱馬屎一九絞取汁飲兒下咽便愈亦治中

客忤而嘔啼而青腹強者

一物馬通浴湯 治少小中忤方

馬通三升燒令煙絕以酒一斗煮三沸去滓浴

兒卽愈

一物猪通浴湯 治小兒中人忤嘔啼面青腹強

者方

猥猪通三升以熱湯灌之適寒温浴兒

治少小客忤二物黃土塗頭方

取竈中黃土蚯蚓屎等分搗合水和如鷄子黃
大塗兒頭上及五心良 一方云用鷄子清和
如泥

治小兒卒客忤方

銅鏡鼻燒令赤著少許酒中大兒飲之小兒不
能飲者含與之即愈

衍義

小兒客忤得之不意間雖有似乎驚恐而實未必

皆驚原其感觸之山總屬不內外因略無關乎表裏所以治療之法僅取易辦不需湯藥如衣中白魚本經原治小兒中風項強背起麝臍辟邪通經驢毛截風牛津通津猪蹄甲治腹中伏熱馬屎汁逐六腑穢毒馬通浴滌除血脈諸風猪通浴蒸發胃經邪氣竈土蚓泥温中解毒銅鏡鼻鎮攝肝氣已上諸治總皆取意以安其心所謂醫者意也

治小兒中馬客忤而吐不止者方

灸手心主間使大都隱白三陰交各三壯可用

粉丸如鼓法並用唾唾而呪之呪法如左

呪客忤法

呪曰摩家公摩家母摩家子兒苦客忤從我始
扁鵲雖良不如善唾良呪訖棄丸道中

又法

取一刀橫著竈上解兒衣發其心腹訖取刀持
向兒呪之唾輒以刀向心腹啡啡曰

音非出
唾貌

煌

煌日出東方背陰向陽葛公葛公不知何公子
來不視去不顧過與生人忤梁上塵天之神戶

下土鬼所經大刀環犀對竈君二七唾客愈兒

驚唾啡啡如此二七啡啡每唾以刀擬之呪當
三遍乃畢用豉丸如上法五六遍訖取此丸破
視其中有毛棄丸道中客忤即愈矣

小兒魘方

論曰凡小兒有魘病者是婦人懷娠有惡神導其腹
中胎妬嫉他小兒令病也魘者小鬼也音奇娠婦人

不必悉招魘魅人時有此耳魘之爲疾喜微微下痢
寒熱或有去來毫毛鬢髮鬢鬢不悅是其證也宜服
龍膽湯凡婦人先有小兒未能行而母又有孕使兒
飲此乳亦作魘也令兒黃瘦骨立髮落壯熱是其證

也

治魃方

炙伏翼熟嚼哺之

又方

燒伏翼末飲服之

又方

以水二升煮蕭蓄冬瓜各四兩融浴之

白蘚皮湯

治少小客魃挾實方

白蘚皮

大黃

甘艸各兩

芍藥

茯苓

細辛

桂心

各十八銖

右七味㕮咀以水二升煮取九合分三服

衍義

魘病雖云觸魘所致既病而加乳食不化結積乳

癖所以腹大寒熱龍膽湯一方專主嬰兒胎熱驚

癇又爲魘病首推虛加人參當歸以助氣血方可

任蜣螂大黃之猛次則白蘚皮湯較前風癇方中

白羊蘚湯功力稍遜白蘚皮專解風毒故風癇亦

多用之大黃蕩滌腸胃有推陳致新之功芍藥除

堅積腹痛茯苓治胸脇逆氣細辛治百節拘攣桂

心利關節結氣甘艸和臟腑寒熱合諸味主治則

風癩乳癬無不兼該何憚魅氣之不釋乎伏翼
為禽中之魅本經主寒熱結氣同氣相攻之用或
炙或燒無不宜之篇蓄為治魅專藥有利水殺蟲
之功冬瓜利大小腸有壓丹石之勤魅病之治總
不外乎滌除乳癬也

小兒夜啼

龍角圓

治小兒五驚夜啼方

崔氏名
五驚丸

龍角

六銖

牡蠣

一作
牡丹

川大黃

各九
銖

黃芩

半兩

蚱蟬

二枚

牛黃

如小豆
五枚

右六味末蜜丸如麻子葶裏兒服二丸隨兒大小

增減

芎藭散 治小兒夜啼至明即安寐方

芎藭

白朮

防已

各半
兩

右三味治下篩以乳和與兒服之量多少又以兒
母手掩臍中亦以摩兒頭及脊驗二十日兒未能
服散者以乳汁和服如麻子一九兒大能服散者
以意斟酌與之

一物前胡圓 治少小夜啼方

前胡隨多少搗末蜜丸如大豆服一九日三稍
加至五六丸以瘥為度

千金湯 治小兒暴驚啼絕死或有火從外來邪

氣所逐令兒得疾衆醫不治方

蜀椒

左顧牡蠣

各六銖碎

右二味以酢漿水一升煮取五合每服一合

又方

伏龍肝

交道中土

各一把

右二味治下篩水和少許飲之

又方

取馬骨燒灰傅乳上飲兒啼即止

治小兒夜啼不已醫所不治者方

取狼屎中骨燒灰爲末水服如黍米粒大二枚
卽定

又方

燒蝟皮三寸灰著乳頭飲之

治小兒驚啼方

取雞屎白熬末以乳服之佳

又方

酒服亂髮灰良

又方

以妊娠時食飲偏有所思者物哺兒則愈

衍義

方書論小兒夜啼但以見火而啼爲胎熱去火而啼爲胎寒此辨固是但未及胎風胎驚胸腹脹痛等治不若干金之兼到也如龍角丸專取東方木氣以透肝風牡蠣以斂腎氣大黃以滌驚痰黃芩以解風熱牛黃以定胎驚蚱蟬專止夜啼爲胎熱驚啼峻藥芎藭散專取芎藭以散風熱白朮以培土虛防己以開痰癰爲滌熱安中專藥前胡九但取一物以下痰氣爲表虛胎風善藥千金湯專取蜀椒以溫中氣牡蠣以鎮腎怯爲腎虛胎寒要藥伏龍肝以填土虛交道士以通脾氣爲

脾虛胎熱土藥 其馬骨灰狼屎骨皆主胎風蟬
皮灰除胃脘痛雞矢白治腹脹滿亂髮灰專主胎
驚隨證取用血肉之味也設治都不應則以其母
懷身時所思之物哺兒以適胎情爲不藥之藥曲
盡夜啼治法矣

傷寒第五

論一首
灸法一首

方三十首

論曰夫小兒未能冒涉霜雪乃不病傷寒也大人解
脫之久傷於寒冷則不論耳然天行非節之氣其亦
得之有時行疾疫之年小兒出腹但患寒者治其
時行節度故如大人法但用藥分劑少異藥小冷耳

麥門冬湯 治小兒未滿百日傷寒鼻衄身熱嘔

逆方

麥門冬

十八銖

石膏

寒水石

甘艸

各半兩

桂心

八銖

右五味咬咀以水二升半煮取一升每服一合日

三

衍義

初生小兒斑衄嘔逆多由稟體之弱寒邪人犯而

蘊熱與大人之伏氣發溫無異所以專取白虎而

兼竹葉石膏炙甘艸湯之製以寒水石代知母而

化腎熱以麥門冬代粳米而滋肺腎其用桂心妙

義有三一保初生陽氣一發諸藥性味一為散熱
嚮導卽伏氣發溫時行疫癘當不出此倘表證未
除不妨仍用桂枝不失南陽本來聖法

芍藥四物解肌湯 治少小傷寒方

芍藥

黃芩

升麻

葛根

各半兩

右四味以水三升煮取九合去滓分五服期歲已
上分三服

衍義

此升麻湯兼黃芩湯之製以升麻湯專行陽明黃
芩湯專走少陽此則兼解二經風熱也

麻黃湯 治少小傷寒發熱咳嗽頭面熱者方

麻黃

生薑

黃芩

各一兩

甘州

桂心

石膏

芍藥

各半兩

杏仁

十枚

右八味咬咀以水四升煮取一升半分二服兒若小以意減之

衍義

此本南陽先師麻黃湯麻杏甘石湯兼越脾湯桂

枝麻黃各半湯等方之製其間但不用大棗者以

嬰兒臟腑窄弱恐其戀膈助滿也與前芍藥四物

解肌湯不用甘州同義此有桂心辛散則甘州又

為必需

治小兒傷寒方

葛根汁

淡竹瀝

各六合

右二味相和二三歲兒分三服百日兒斟酌服之
不宜生煮服佳

衍義

葛根搗汁以散陽明客邪淡竹炙瀝以清胃中痰
熱不宜生服者恐其寒滑作瀉也

治小兒時氣方

桃葉三兩搗以水五升煮十沸取汁日五六遍
淋之若復發燒雄鼠屎二枚燒水調服之

衍義 桃葉專辟一切時行不正之氣若淋之蒸之其熱

不解此必素稟腎虛邪乘於壘故燒狻鼠屎以祛

內陷之熱也

五味子湯 治小兒傷寒病久不除瘥後復劇瘦

瘠骨立方

五味子 十銖

麥門冬

黃連

黃芩

大黃

前胡

各六銖

芫硝 五銖

石膏 一兩

甘艸

當歸 各十銖

右十味咬咀以水三升煮取一升半服二合得下

便止計大小增減之

衍義

小兒傷寒病久不除或瘥後復劇此必邪從火化

而陷伏不解所以瘦瘠骨立非急投三黃下奪無

以泄之三黃不逮濟以芒硝石膏其前胡麥冬五

味甘艸當歸以滋津氣之燥在嬰兒固為合劑以

元神未動不慮其引邪內賊也

莽艸浴湯 治少小傷寒方

莽艸 半斤

牡蠣 四兩

雷丸 三十枚

大黃 一兩

蛇床子 一升

右五味以水三斗煮取斗半適寒温以浴兒避眼

及陰

又方 治小兒卒寒熱不住不能服藥方

莽艸

丹參

桂心

各三兩

菖蒲

半斤

雷丸

一升

蛇床子

二兩

右六味以水二斗煮三五沸適寒温以浴兒避眼

及陰

雷丸浴湯 治小兒忽寒熱方

雷丸

二十枚

大黃

四兩

黃芩

一兩

苦參

石膏

各三兩

丹參

二兩

右六味咬咀以水二斗煮取一斗半浴兒避眼及

陰浴訖以粉粉之勿厚衣一宿復浴

李葉浴湯 治少小身熱方

李葉隨多少咬咀以水煮去滓浴兒良

柳枝浴湯 治小兒生一月至五月乍寒乍熱方

柳枝細切煮取汁洗兒若渴絞冬瓜汁服之

青木香浴湯 治小兒壯熱羸瘠方

青木香 四兩

麻子仁

竹葉

各一升

虎骨 五兩

白芷 三兩

右五味咬咀以水二斗煮取一斗稍稍浴兒

衍義

已上六方皆取其蕩邪熱逐毒氣之功宜諒稟質

隨時取用

十二物寒水石散

治少小身體壯熱不能服藥

方

寒水石

芒硝

滑石

石膏

赤石脂

青木香

大黃

甘艸

黃芩

防風

芎藭

麻黃根

右各等分合治下篩以粉一升藥屑三合相和復

以篩篩之以粉兒身日三

衍

一派苦寒辟熱藥中祇取防風一味達表石服一

味實裏麻黃根一味斂汁九賴米粉以實肌肉

李根湯 治小兒暴有熱得之二三日者方

日李根 桂心 芑硝 各十

麥門冬 甘艸 各一

右五味咬咀以水三升煮取一升分五服

衍義李根鹹寒降火芑硝苦寒蕩熱麥門甘艸甘平滋

津桂心辛温破結熱因熱用從治之治也

升麻湯 治小兒傷寒變熱毒病身熱面赤口燥

心腹堅急大小便不利或口瘡者或因壯熱便

四肢攣掣驚仍成癩疾時發時醒醒後身熱如

火者悉主之方

升麻

白薇

麻黃

大黃

柴胡

甘艸

黃芩

枳實

大黃

鈎藤

各六銖

右十味咬咀以水三升先煮麻黃去上沫內諸藥

煮取一升兒生三十日至六十日一服二合六十

日至百日一服二合半百日至二百日一服三合

衍義

此採麻黃升麻湯中五味以二麻透表黃芩泄熱

萎甘潤燥參入白薇散堅柴胡退熱硝黃蕩實

藤舒攣表裏兼治之捷法仍從南陽法中化出

大黃湯 治小兒肉中久挾宿熱瘦瘠熱進退休

作無時方

大黃

甘艸

芒硝

各半兩

桂心

八銖

石膏

一兩

大棗

五枚

右六味咬咀以水三升煮取一升每服二合

又方治小兒腹大短氣熱有進退食不安穀為

不化方

大黃

黃芩

甘艸

麥門冬

芒硝

各半兩

石膏

一兩

桂心 八銖

右七味咬咀以水三升煮取一升半分三服期歲已下小兒作五服

衍義

前方以肉中久挾宿熱故用大棗引硝黃甘石入於營分然非桂心無以散之後方以腹大短氣故用黃芩麥冬引硝黃甘石入于氣分仍用桂心為嚮導耳

蜀漆湯 治小兒潮熱方

蜀漆

甘艸

知母

龍骨

牡蠣 各半兩

右五味咬咀以水四升煮取一升去滓一歲兒少
少溫服半合日再

衍義此即金匱蜀漆散彼治大人牡瘡故用漿水欸蜀

漆以按痰涎此治小兒潮熱故用知母佐牡蠣以

靜伏熱用甘艸者即外臺牡蠣湯去麻黃而易知

母一從表散一從內解兩不移易之定法

竹葉湯 治小兒夏月患腹中伏熱溫壯來往或

患下痢色或白或黃三焦不利方

竹葉 切

小麥 各五合

柴胡

麥門冬

人參

甘艸 各半兩

茯苓

十八銖

黃芩

一兩六銖

右八味㕮咀以水四升煮竹葉小麥取三升去竹葉小麥下諸藥煮取一升半分三服若小兒夏月忽壯熱燒人手洞下黃澹氣力憊然脈極洪數用此方加大黃二兩再服得下即瘥

又方 治五六歲兒溫壯腹中急滿息不利或有微腫亦治極羸不下飲食堅痞手足逆冷方

竹葉

升切一

小麥

半升

甘艸

黃芩

枯蕒根

澤瀉

茯苓

知母

白朮

大黃各一兩

桂心二銖

生薑一兩半

人參

麥門冬

半夏各二兩

當歸十八銖

右十六味咬咀以水七升煮竹葉小麥取四升去

滓內諸藥煎取一升六合分四服

治小兒連壯熱實滯不去寒熱往來微驚悸方

大黃一兩

黃芩

栝蔞根

甘州各十銖

滑石二兩

桂心

牡蠣

人參

龍骨

凝水石

白石脂

消石各半兩

右十二味咬咀以水四升煮取一升半每服三合

一日一夜令盡雖吐亦與之

一本加紫石英半兩

衍義

千金治五心煩熱口乾脣燥胸中熱悶有竹葉湯

方用竹葉小麥知母石膏茯苓黃芩麥冬人參甘

艸栝蓏半夏生薑其第一方卽南陽竹葉石膏湯

中去石膏半夏粳米加小麥茯苓黃芩柴胡蓋竹

葉石膏湯本治傷寒解後虛羸少氣氣逆欲吐故

用石膏粳米以清胃中餘熱半夏以治氣逆欲吐

設無吐逆可無藉於半夏也此治小兒腹中伏熱

溫壯來往故用小麥茯苓以除伏熱煩擾黃芩柴

胡以治溫壯來往設無溫壯可無藉於柴胡也

其又方但於前方除去柴胡一味仍用竹葉石膏湯中知母半夏加入白朮大黃桂心當歸栝蓂根澤瀉生薑其妙用全在桂心一味知母黃芩得之以破其結大黃白朮得之以振其威奇兵妙用詢非庸俗可得而擬議者 其第三方治小兒連壯熱實滯卽又方之變法其用石脂龍骨牡蠣卽又方白朮之意用滑石卽又方澤瀉之意用凝水石卽又方竹葉知母之意用消石卽又方半夏生薑之意不特能滌痰涎兼可助桂心爲祛熱之嚮導

也

調中湯 治小兒中秋月晨夕中暴冷冷氣折其
四肢熱不得泄則壯熱冷氣入胃變下痢或欲
赤白滯起數去小腹脹痛極壯熱氣脈洪大或
急數者服之熱便歇下亦瘥也但壯熱不吐下
者亦主之方

葛根

黃芩

茯苓

桔梗

芍藥

白朮

藁本

大黃

甘艸 各六銖

右九味咬咀以水二升煮取五合服法如前篇龍

膽湯下量兒大小以意服之

衍義

葛根藁本甘艸解表藥也黃芩芍藥甘艸清熱藥

也大黃黃芩甘艸攻裏藥也蒼朮桔梗甘艸和中藥也爲小兒寒鬱熱邪腹痛下痢之的方功用與人參敗毒相髣

生地黄湯 治小兒寒熱進退啼呼腹痛方

生地黄

桂心

各二兩

右二味以水三升煮取一升期歲已下服二合已上三合一方七味有芍藥寒水石黃芩當歸甘

艸各半兩

行義

熱邪入犯營血則寒熱進退故用生地黃專治血熱則兼桂心以行地黃之滯寒熱兼濟之妙無愈於此又方合黃芩湯則專主太陽少陽合病更加寒水石以治心胃之火當歸以散肝脾之熱也

治小兒傷寒發黃方

搗土瓜根汁三合服之

又方

搗韭根汁澄清取如大豆許滴兒鼻中即出黃

水瘡

又方

搗青麥汁服之

又方

小豆 三七

瓜蒂 二七

糯米 四十

右三味爲末吹入鼻中

衍義

土瓜根專主濕熱發黃韭汁專散瘀熱青麥汁專

散肝熱瓜蒂散加糯米吹鼻取下黃水專散在上

濕熱也但不可以筒極力過吹入腦令人喘息立

死

二物通汗散 治少小有熱不汗方

粉 半斤

雷丸 四兩

右擣爲細末和下篩以粉兒身

二物茯苓粉散治少小頭汗方

茯苓

牡蠣各四兩

右治下篩以粉八兩合擣爲散有熱輒取粉汗卽

自止

三物黃連粉散治少小盜汗方

黃連

牡蠣

貝母各十銖

右以粉一升合擣下篩取粉兒身佳

衍義

雷丸殺三蟲逐毒氣去胃中熱故能通汗茯苓守

五臟之氣牡蠣斂下焦之熱黃連貝母寒潤得牡

蠟之鹹寒雜粉以粉兒身專主小兒虛熱津液不固之盜汗

犀角飲子 此由心藏熱之所感宜服此方

犀角 十八銖

茯神 一兩

麥門冬 一兩半

甘艸 半兩

白朮 六銖

右五味咬咀以水九合煎取四合分服加龍齒一

兩佳

術義

犀角散胃熱之首藥得門冬茯神引入心包白朮

甘艸收斂津液倘服之不應加龍齒以收肝氣之

散

恆山湯 治小兒溫瘧方

恆山切

小麥三合

淡竹葉切

右三味以水一升半煮取五合量兒大小分服

衍義

恆山專滌內蘊之痰為截瘧之峻味小麥竹葉專

清胃中煩熱也

又方

鹿角末臨發時先服一錢七

又方

燒鱉甲灰以酒服一錢七至發時服三七并以

火炙身

又方

燒雞臍中黃皮為末和乳與服男雄女雌

衍義

鹿角專補督脈督脈固則外邪不能容矣驚甲專
辟肝邪雞肌脰專滌胃滯肝胃淨寒熱自除

又方

灸兩乳下一指三壯

孫真人千金方衍義卷五上

終